

आदर्श महाकवि, भावलिङ्गी संत प.पू. श्रमणाचार्य श्री विमर्शसागर जी महाराज की बुंदेली पूजन

पाद प्रक्षालन

चलत ईर्या समिति से गुरुवर, देख देख पग धरवें।
स्वर्ण कलश में जल भरके हम, पग प्रक्षालन करवें।।
गुरु त्याग पनहइयाँ ककरन पे भी, चलत है पईयाँ पईयाँ।
सारे जग में दूढों हमने, ऐसे गुरु कउँ नइयाँ।। आये पूजन....

स्थापना

भाव सजावें भगत बुलावें, हिरदय में पधरावें।
गुरुवर अइयो, भूल न जइयो, हम सब टेर लगावें।।
अष्ट द्रव्य को थाल सजाये, द्वार खड़े सब गुइयाँ।
सारे जग में दूढो हमने, ऐसे गुरु कउ नइयाँ।।

ॐ हूँ प.पू. आचार्यश्री विमर्शसागर जी यतिवरेभ्यो अवतर अवतर संवौषट् आह्वाननम्।
अत्र तिष्ठ तिष्ठ ठः ठः स्थापनम्, अत्र मम् सन्निहितो भव भव वषट् सन्निधिकरणं।

द्रव्य समर्पण

आये पूजन करन, आये पूजन करन, पूजा हमार्ई स्वीकारौ ।
लम्बो रस्सा लये बाल्टी, कुड़ियाँ नेंगर गये हम ॥
फींचो छन्ना, सुखा घाम में, पानी छान भरे हम ॥
ऊ पानी से गुरु खों पूजें, धन्य भई वा कुड़ियाँ ॥
सारे जग में ढूढो हमने, ऐसे गुरु कउँ नइयाँ ॥ आये पूजन....

ॐ हूँ प.पू. आचार्यश्री विमर्शसागर मुनीन्द्राय जन्म जरा मृत्यु विनाशनाय जलं निर्वपामीति स्वाहा ।

चंदन

चंदन की मुठिया से सिलिया पे घिस लई जा केशर ।
रजत रकेवी में भरके हम, चले आये गुरु के दर ॥
ऊ शुद्ध सुगंधित केशर से हम पूजें गुरु की पइयाँ ।
सारे जग में ढूढो हमने, ऐसे गुरु कउँ नइयाँ ॥ आये पूजन....

ॐ हूँ प.पू. आचार्यश्री विमर्शसागर मुनीन्द्राय संसार ताप विनाशनाय चंदनं निर्वपामीति स्वाहा ।

अक्षत

धान दूरी अपने हाथन से, सूपा से फटकारी।
लैके चाँउर छाने वीने, धोउन गये अटारी।।
उन अक्षत चाँउर से पूजें, गाके ता ता थड़याँ।
सारे जग में दूढो हमने, ऐसे गुरु कउँ नइयाँ।। आये पूजन....

ॐ हूँ पद्म आचर्यश्री विमर्शसागर मुनीन्द्राय अक्षय पदप्राप्तये अक्षतं निर्वपामीति स्वाहा ।

पुष्प

गेंदा बेला जुही चमेली, बारी सें लै आये।
महकत हैं जे ऐसे भइया, सबई के मन हृषाये।।
उन फूलन सें गुरु खों पूजें, गुरवर काम नसइयाँ।
सारे जग में दूढो हमने, ऐसे गुरु कउँ नइयाँ।। आये पूजन....

ॐ हूँ पद्म आचर्यश्री विमर्शसागर मुनीन्द्राय कामबाण विध्वंसनाय पुष्पं निर्वपामीति स्वाहा ।

नैवेद्य

लई लकरियाँ सूखीं सूखीं, चूल्हो फूंक जराओ।
धरी करहिया, बरा थडूला, सद् नेवज बनबाओ।।
गुरु पूजन की परी हुलतुली, नई बन पाई सिमड़याँ।
सारे जग में दूढो हमने, ऐसे गुरु कउँ नइयाँ।। आये पूजन....

ॐ हूँ परम आचार्यश्री विमर्शसागर मुनीन्द्राय क्षुधा रोग विनाशनाय नैवेद्यं निर्वर्णायोति स्वाहा ।

दीप

लई कपास पहला की बाती, घी में खीब डुबाई।
गुरु पूजन खों दिया मैं घरकें, जगमग लौ प्रगटाई।।
घी निकलो हतो दूध से जिनके, धन्य भई वे गइयाँ।
सारे जग में दूढो हमने, ऐसे गुरु कउँ नइयाँ।। आये पूजन....

ॐ हूँ परम आचार्यश्री विमर्शसागर मुनीन्द्राय मोहान्धकार विनाशनाय दीपं निर्वर्णायोति स्वाहा ।

धूप

अगर तगर आदिक से मिश्रित, धूप दशांगी लेवें।
गुरु पूजन खों कुण्ड जराकें, आऔ धूप हम खेवें।।
महक उठी हैं दशों दिशायें, नाचें लोग लुगइयाँ।
सारे जग में दूढो हमने, ऐसे गुरु कउँ नइयाँ।। आये पूजन....

ॐ हूँ परम आचार्यश्री विमर्शसागर मुनीन्द्राय अष्टकर्म दहनाय धूपं निर्वपामीति स्वाहा।

फल

डरपक गदरीं बिहीं पपीता, शाहें लेदी लावें।
गुरु गुण के फल पावे खों, हम फल की भेंट चढ़वें।।
गुरु गैल सांची है बांकी, सब है भूल भुलईयाँ।।
सारे जग में दूढो हमने, ऐसे गुरु कउँ नइयाँ।। आये पूजन....

ॐ हूँ परम आचार्यश्री विमर्शसागर मुनीन्द्राय महामोक्षफल प्राप्तये फलं निर्वपामीति स्वाहा।

अर्घ्य

आठों दरब मिलावें गावें, छंद अरघ को सब जन।
आऔ मिलके अर्घ चढइये, करिये गुरु की पूजन।।
दुलक नगडियां, बजा बजाकें, गावें आज बधइयां।
सारे जग में दूढो हमने, ऐसे गुरु कउ नइयां।। आये पूजन...

ॐ हूँ पपू आचर्य श्री विमर्शसागर मुनीन्द्राय अनर्घ पद प्राप्तये अर्घ्य निर्वपाणीति स्वाहा ।

जयमाला

नोनों लगत गुरु को दोर, निहारत सब जन गुरु की ओर
ज्ञान की धार बहाई है....2.....2.....

आठों दरब सजाके हमने, पूजा रचाई है।

कि विनती सुन लइयो, तनक तौ सुन लइयो।।2।।
गणाचार्य के शिष्य गुरु जी, जो वंदन स्वीकारों।

हमखों भी अपनी वाणी से, भव से पार उतारौं।।
लवरा छाग रहे हैं जग में, भवसागर में डारत।
सांची सांची बोलन बारे, सबखों तुमई उवारत।।
नाम है सुंदर गुरु विमर्श, सुनत है जो कोउ पाउत हर्ष।
वीर की मुद्रा पाई है....

आठों दरव सजाके हमने, पूजा रचाई है।
कि विनती सुन लइयो, तनक सौ सुन लईयो।
वैरी बनो करम जो हमरो, भव भव में हतो पेरत।
कहूं गैल न मिली चैन की, हारे हेरत हेरत।।
बडो पुण्य औसर जो आओ, भावलिंगि गुरु पाये।
हेरत हेरत बहु दिन बीते, अब दर्शन मिल पाये।।
कि अब ना संग छोरियो नाथ, चरण में रख दओ हमने माथ।

तुम्हई से आस लगाई है....

आठों दरव सजाके हमने, पूजा रचाई है।
कि विनीत सुन लइयो, तनक तौ सुन लइयो।
बुंदेली में पूजा लिखके, हमने पुण्य बढाओ।
आठ दरव से तुम्हें पूजकें, अपनो भाग्य जगाओ।।
वैरागी निर्ग्रथ तपोधन, तुम्हई हौ सुख की छइयां।
सारे जग में ढूँढो हमने, तुमसो गुरु कोउ नइयां।
तपोधन तुम्हीं हो निर्ग्रथ, धारलओ तीर्थकर को पंथ।
वीतरागी छवि भाई है....

आठों दरव सजाके हमने, पूजा रचाई है।
कि विनती सुन लइयो, तनक तौ सुन लइयो

ॐ हूँ श्रमणाचार्यश्री विमर्शसागर यतिवरेभ्यो जयमाला सहित पूर्णार्घ्यं निर्वपामीति स्वाहा।

शब्द श्रृंखला बुंदेली की, देउत जो 'संकेत'।
विनत रहौ गुरु चरण में, जागै आत्म 'विवेक'।।
पुष्प समर्पित गुरु चरणन में, जो चढ़वें उच्च चढ़इयाँ।
सारे जग में दूढो हमनें, ऐसे गुरु कउं नइयाँ।

।।दिव्य पुष्पांजलि क्षिपेत।।

सृजनकार
पं. संकेत जैन 'विवेक'
देवेन्दनगर, पन्ना, म.प्र.